

# Акафист

## Пресвятой Богородице



перед чудотворной Иконой Её,  
именуемой  
**«Знамение» Курская-Коренная**

### Кондак 1

Взбранной Воеводе и благой Одигитрии, путеводящей нас к Небесному Граду, приидите припадём вси, града зде пребывающего не имущии, Тоя всесильного заступления просяще, чудеса же от лет древних даже доныне от Иконы Ея бываемыя поминающе, велегласно возопиим:

Радуйся, Владычице, знамения милости Твоея миру присно являющая.

### Икос 1

Ангели удивишася зряще Тя, Владычице, Иконою Твоею, яко столпом огненным нам предходящую в великом исходе нашем из земли, беззаконники поработенныя. Не Моисея бо, но Самую Тя имамы Путеводительницу в скорбном странствовании нашем, темже Ти благодарне зовем:

Радуйся, благословенная Одигитрие; Радуйся, истинного Пути Мати.

Радуйся, сквозе пустыню мира сего нас провождающая; Радуйся, Амалика мысленного преславно побеждающая.

Радуйся, источники благодати от Иконы Твоея источающая; Радуйся, закон Сына Твоего, Христа Бога нашего, на скрижалях сердец наших написующая.

Радуйся, зноем страстей палимых благодатное  
Окропление; Радуйся изнемогающих всемошное  
Укрепление.

Радуйся, сердец смятенных тишайшая Усла-  
до; Радуйся, странных и сирых Божественная  
Отрадо.

Радуйся, землю обетованную нам приуготовля-  
ющая; Радуйся, небеснаго Иерусалима врата нам  
отверзающая.

Радуйся, Владычице, знамения милости Твоя  
миру присно являющая.

### **Кондак 2**

Видехом, видехом выну чудеса и знамения  
Твоя, Владычице, исповедуем милость, не таим  
благоденний Твоих, обаче велегласно вопием:  
Аллилуиа.

### **Икос 2**

Разум Божий кто постиже и тайну судеб Его кто  
повесть? Возводит бо и низводит, смиряет и воз-  
носит, поражает и исцеляет, и кто бысть совет-  
ник Ему? Темже и нас, грех наших ради, смири и  
царство наше низложи, сыны наша по всему лицу  
земли разсеяв. К кому убо прибегнем в скор-  
би нашей, к кому руце прострем, аще не к Тебе,  
Всеблагая. Обаче сердцем сокрушенным вопием  
Ти таковая:



Радуйся, Сына Твоего за нас умоляющая;  
Радуйся, праведный гнев Божий утоляющая.

Радуйся, беззаконий наших Очищение;  
Радуйся, грешным Ходатаице прощения.

Радуйся, светильник упования немеркнущий  
нам возжегшая; Радуйся, во исходе и странст-  
вовании нашем Иконою Твоею нам предтекшая.

Радуйся, вся разсеянные воедино Собирающая;  
Радуйся, Омофором Твоим светообразным вся  
покрывающая.

Радуйся, раздоры и нестроения умиряющая;  
Радуйся, советы нечестивых разоряющая.

Радуйся, плавающих в житейском море окор-  
мляющая; Радуйся, попечением Твоим ни еди-  
наго же оставляющая.

Радуйся, Владычице, знамения милости Твоя  
миру присно являющая.

### Кондак 3

Силы Тобою деются и благодать от честных  
Иконы Твоя неоскудно изливается, Пре-  
благословенная Дево, вся подвизая о Тебе вопити:  
Аллилуиа.

### Икос 3

Имуще милосердие неизреченное, тамо благо-  
дать Твою возсияваеши, Всеблагая, идеже тьма  
огустевает и скорби преумножаются, темже не

оставила еси нас сирых, обаче во Иконе Твоей к нам убогим пришла еси, славящим Твое снисхождение и вопиющим сице:

**Радуйся**, чудес море; **Радуйся**, милости пучино.

**Радуйся**, благодати приснотекущий Источниче; **Радуйся**, исцелений Кладезю неисчерпаемый.

**Радуйся**, естества уставы победшая; **Радуйся**, законы естественныя пременившая.

**Радуйся**, скорби наша на радость предлагающая; **Радуйся**, плач и стенание в Веселие духовное претворяющая.

**Радуйся**, озлобления и беды на пользу нам обращающая; **Радуйся**, враги наша преславно смиряющая.

**Радуйся**, чаяния врагов посрамляющая; **Радуйся**, поющая Тя возвеселяющая.

**Радуйся** Владычице, знамения милости Твоя миру присно являющая.

#### **Кондак 4**

**Бури** искушений на нас находящей, скорбям же и болезням нас посещающим, егда терпению в нас оскудевати и духу нашему смущатися, притецем ко образу Пречистая Девы и слезы точаще Той, от сердца возопиим: Богоносней, руце Твои нам простираючи, из глубины зол возведи ны, яко да благодарными усты зовем: Аллилуиа.

#### Икос 4

Слышаху древле людие российстии слух явления святого Твоего образа в дубраве Курстей и текше к нему со тщанием, умильно взываху: откуда нам сие, да прииде к нам Мати Господа нашего, узрев же Икону Твою, Владычице, при корене древеснем лежащую, и приемше ю, яко сокровище великое, возопиша Тебе, Первообразней:

Радуйся, Раю светлейший, древо Жизни израстивший; Радуйся, Вертограде Божественный, древо Церкви прозябший.

Радуйся, Цвете благовонный, мир весь облагодухай; Радуйся, Крине непорочный, вселенную украшая.

Радуйся, Лозо плодоносная, вином умиления всех напоившая; Радуйся, Розго освященная, плоды сладостными род человеческий напитавшая.

Радуйся, Кореню домостроительства Божия; Радуйся, спасения нашего Верх и Главизно.

Радуйся, злыя наши страсти из корене посекающая; Радуйся, добродетелей сад насаждающая,

Радуйся, добрые обычаи в нас вкореняющая, Радуйся, причастники райския жизни быти нас сподобляющая.

Радуйся, Владычице, знамения милости Твоя миру присно являющая.

## Кондак 5

Боготочней звезде подобящися, Икона Твоя честная, Госпоже, землю Русскую и грады ея обтекаше, царие сей благоговейно поклоняхуся, царицы любовию ту благоукрашаху, архиереи страхом сретаху, верных же множества, духовно торжествующе, вопияху: Аллилуиа.

## Икос 5

Видяще безбожников безумный совет Икону Твою, Пречистая, разорити, от Тебе, Дево, посрамленный, и обретше образ Твой святыи от всякаго действия сокрушительна невредим, монаси и мирстии страхом и любовию возопиша Ти сицевая:

Радуйся, Крепосте несокрушимая; Радуйся, Стено нерушимая.

Радуйся, лютых безбожников совет посрамившая; Радуйся, чаяния врагов осуетившая.

Радуйся, хулителей уста заградившая; Радуйся, Икону Твою святую невредимо сохраняющая.

Радуйся, от руки злодейской сия соблюдающая; Радуйся, очи Твои от скверных дел человеческих обращающая.

Радуйся, лица Твоего Пречистаго от нас, убогих, не отвращающая; Радуйся, из руки диаволи грешныя исхищающая.



Радуйся, прощение кающимся возсиявающая;  
Радуйся, двери милосердия Божия ходатайством Твоим отверзающая.

Радуйся, Владычице, знамения милости Твоея миру присно являющая.

### Кондак 6

Проповедует мир весь милости, от Иконы Твоея изливаемая, Всецарице! Отнелиже бо изшла еси тою из земли Русския, несть град, ниже весь, в нихже не бе являема сила Твоя. Темже от всех язык спасеннии и Тобою вопиют благодарно Богу: Аллилуиа.

### Икос 6

Возсияй нам паки свет упования, Богородице Пречистая, зарю спасения миру возвестившая во Твоем рождестве. Не предаждь нас до конца в руке врагов наших и советы нечестивых и лютых отступников скоро разори. Да будет и страна наша Российская, якоже древле дом Твой, да процветет в ней благочестие, святые обители и храмы да благоукрасятся, людие же, от лютых безбожников избавльшися, да торжествуют с веселием, славяще Твое заступление и зовущи Те таковою:

Радуйся, любовию Твоею всему миру возсиявшая; Радуйся, из уст Божественных Сына Твоего усыновление рода человеческого приявшая.



Радуйся, Мати Божия и Мати православным христианом; Радуйся, недугов отъятие и Целительнице раном.

Радуйся, в темницах сущих незаходимый Свете; Радуйся, узников Отрадо и Пространство клетей.

Радуйся, за правду гонимых Дерзновение; Радуйся, за веру страждущих Терпение.

Радуйся, мучеников Венчание; Радуйся, мучителей грозное Воздаяние.

Радуйся, связнем узы разрешающая; Радуйся, телом и душою плененных свободящая.

Радуйся, Владычице, знамения милости Твоя миру присно являющая.

### Кондак 7

Хотящу праведному Судии и Богу человеки, Того забывающия, вразумити, попусти бранем велиим на земли воздвигнутися. Языцы бо смятошася и царства поколебашася. Смерть и ужас по лицу земли проидоша, плач и стенание воздух огласи. Тогда убо вси, иже на Тя упование возложиша, Богородице, ко образу Твоему усердно притекаху и, от Тебе единыя спасения чающе, Богу, давшему Тя людем Заступницу, вопияху: Аллилуиа.

### Икос 7

Новые знамения и чудеса велия явила еси от Иконы Твоя честныя, Богомати, егда услышахом глас брани. Градом бо горящим и земли трясущим

щейся, чертогом разрушаемым и пругом, воздух исполняющим, соблюла еси церковь, в нейже образ Твой, Всецарице, пребываше, невредиму: вси же в ней молящиеся, чудо видяще, едиными усты возопиша Ти таковая:

Радуйся, Державная Воеводо; Радуйся, на Нюже уповают вси народи.

Радуйся, Церкви Столп и Утверждение; Радуйся, всякия святыни Защито и Ограждение.

Радуйся, Победо, мир побеждающая; Радуйся, и неимуция упования спасающая.

Радуйся, благая Послушательнице молений прилежных; Радуйся, беспомощных Помоще и Надеждо ненадежных.

Радуйся, сатану под нозе наша сокрушающая; Радуйся, огню и стихиям повелевающая.

Радуйся, Иконою Твоею нас остенияющая; Радуйся, Покровом Твоим нас осеняющая.

Радуйся, Владычице, знамения милости Твоея миру присно являющая.

### **Кондак 8**

Странное и страшное знамение явила еси, Всесвятая, егда домом разрушаемым, храмину малую, юже осватила еси прежде Иконы Твоея пребыванием, сохранила еси невредиму, старицу же и сына ея, в той крыющихся, целых представила еси. Тем же вси, зрящия и слышашия сия, ужасохуся ужасом, страхом вопиюще: Аллилуиа.

## Икос 8

Весь мир любовью Твоею Богоподобною объемлеши, Приснодево, ближняя и дальняя посещающи и всю поднебесную во Иконе Твоей приснопоклоняемей обтекающи. Тем же от восток даже до запад шествие Твое бысть, да вси невозбранно к той припадают, Тебе же Первообразней припевают сиевая:

Радуйся, всех Радостей Радосте; Радуйся, Чаше неупиваемая сладости.

Радуйся, нынешняго века скорбнаго Утешение; Радуйся, будущия жизни Наслаждение.

Радуйся, веселящихся на небеси нас ради оставляющая; Радуйся, к земли многоскорбней и многобедствующей приникающая.

Радуйся, со Иконою Твоею благодатными стопы невидимо в дома наша входящая; Радуйся, благословение и радование тем приносящая.

Радуйся, келии монашеския образом Твоим честным освящающая; Радуйся, клетки убогия паче палат царских тем украшающая.

Радуйся, храмы Божии Лицом Твоим Пресвятым облистающая; Радуйся, в жилищах чтущих Тя незримо пребывающая.

Радуйся, Владычице, знамения милости Твоя миру присно являющая.

### Кондак 9

Всяк возраст и всяк чин притекает к Тебе, Богоневесто, Владычице, всем бо простерты суть Богоносней Твои руце, всем вся подаеши независтно, вся светлиши и утешаеши, Всещарице. Темже, о Тебе веселящаяся, вопием Богу: Аллилуиа.

### Икос 9

Вития многовещанныя увядоша и риторы благоГлаголивию изнемогоша, по долгу Тя прославити хотящии, Марие Богородице, недоумет бо всяк ум благохвалити Тя по достоянию, обаче аще мы умолкнем — камене возопиют. Темже, аще и недостойнии суще, бренными усты дерзаем взывати Ти таковая:

Радуйся, пророков огнедохновенный Глагол;  
Радуйся, апостолов Проповедь неумолкаемая.

Радуйся, преподобных сердечное Пение; Радуйся, исповедников Крепосте и Дерзновение.

Радуйся, молчальников тайнолепная Беседа;  
Радуйся, риторов и Богопроповедников Златыя Уста.

Радуйся, на страсти подвизающихся превознесенная Награда; Радуйся, всех праведников Божественная Отрада.

Радуйся, матерей Славо и девства Похвало;  
Радуйся, старцев покой и юных Водительнице.



Радуйся, Адама смертного Дщи, Богу же Родительнице; Радуйся, славою неизреченною близ Бога сияющая.

Радуйся, Владычице, знамения милости Твоея миру присно являющая.

### Кондак 10

Спаستися миру тепле помолися, Богородице, Помощи бо Твоея требует, сетям лукаваго, по всему лицу земли распростертым, языком же шатающимся и бурям напастей, на Церковь Божию воздвигаемым; темже, якоже в Кане Галилейстей иногда, рцы слово к Сыну Твоему и Богу, да воду искушений же и скорбей в вино умиления и веселия Божественного претворит, да поем Ему выну: Аллилуиа.

### Икос 10

Стена необоримая нам буди, Всенепорочная, сопротив ополчений видимых и невидимых враг, державно по нас поборающая, любовьию вопиющих Ти таковая:

Радуйся, Богоносней руце Твои о нас к Богу присно воздвигающая; Радуйся, духов злобы под нозе наша покоряющая.

Радуйся, князя тьмы хитросплетенные советы посрамляющая; Радуйся, тучи помыслов Духом Божиим развевающая.

Радуйся, уныние от нас отгоняющая; Радуйся, треволнения житейския смиряющая.

Радуйся, бурем напастей повелевающая; Радуйся, обуреваемых благодатно окормляющая.

Радуйся, из глубины зол извлекающая; Радуйся, погибающим длани милостивно простирающая.

Радуйся, нози наша на пути спасения наставляющая; Радуйся, руце наша во бранех укрепляющая.

Радуйся, Владычице, знамения милости Твоея миру присно являющая.

### Кондак 11

Пения наша, якоже Сын Твой вдовичу лепту, приими, Всесвятая, и подаждь нам всегда Тебе сия приносить, живот наш в мире управляющи и грехом прощение дарующи, яко да в небесныя обители вшедше, воскликнем Богу: Аллилуиа.

### Икос 11

Светообразный омофор Твой, Всеблагая, над землею нашею невидимо прости, нечестия безлунную ночь прогоняющи, зарю же пакибытия возсиявающи, да в радости немолчно зовем:

Радуйся, воистину в Солнце облеченная; Радуйся, венцем от звезд увязенная.

Радуйся, рясны златыми преиспещренная; Радуйся, Красото неизреченная.

Радуйся, Светлосте, денницы светлейшая; Радуйся, Тепло, солнца любезнейшая.

Радуйся, Зарнице будущего века; Радуйся, Свете не вечерний ангелов и человеков.

Радуйся, темныя демонския полки далече отгоняющая; Радуйся, неверия тьму просвещающая.

Радуйся, во оружия света нас облакающая; Радуйся, Святыне, цветы всех добродетелей благоухающая.

Радуйся, Владычице, знамения милости Твоя миру присно являющая.

### **Кондак 12**

Благодать возблагодарить от Иконы Твоя прияхом, Богородице Пречистая. Никтоже бо, притекаяй к той с верою, тощ отходит, но кийждо по потребе своей дар Божественный приемлет и радостию венчается, вопия к Богу: Аллилуиа.

### **Икос 12**

Поем Тя, величаем Тя, поклоняем Ти ся, Госпоже Пречистая, сытости похвал Твоих отнюдь не знающе, и припадающе пред честным Твоим образом, умильно взываем Ти сице:

Радуйся, душ наших сладчайшая Весно; Радуйся, сердец наших светлейшее Утро.

Радуйся, Высото неумышляемая; Радуйся, Славо неувядаемая.

Радуйся, Блаженство нескончаемое; Радуйся, Благосте неизсякаемая.

Радуйся, Веселие неизреченное; Радуйся, воистину едина Препоблагословенная.

Радуйся, превыше всей твари Превознесенная; Радуйся, в житии сем нас заступающая.

Радуйся, в час смертный верная сретающая; Радуйся, яко и на Страшнем Судищи спасаеши на Тя уповающие.

Радуйся, Владычице, знамения милости Твоея миру присно являющая.

### Кондак 13

О, Всепетая Мати и Мати всем христианом, Сыну Твоему и Богу любовью подражаючи, вопиеш к нам милостивно: не бойся, малое стадо, Аз есмь с вами и никтоже на вы! Темже Ти любовью припадающе и со слезами благодаряще, велегласно зовем: Аллилуиа.

*Этот кондак читается трижды,  
затем икос 1-й «Ангели удивившася ...»  
и кондак 1-й «Взбранной Воеводе ...».*

### Икос 1 (читается)

Ангели удивившася зряще Тя, Владычице, Иконою Твоею, яко столпом огненным нам предходящую в великом исходе нашем из земли, беззаконники поработенныя. Не Моисея бо, но Самую Тя имамы Путеводительницу в скорбном странствовании нашем, темже Ти благодарне зовем:



Радуйся, благословенная Одигитрие; Радуйся, истинного Пути Мати.

Радуйся, сквозе пустыню мира сего нас про-  
возжающая; Радуйся, Амалика мысленного  
преславно побеждающая.

Радуйся, источники благодати от Иконы Тво-  
ея источающая; Радуйся, закон Сына Твоего,  
Христа Бога нашего, на скрижалях сердец наших  
написующая.

Радуйся, зноем страстей палимых благодатное  
Окропление; Радуйся изнемогающих всемошное  
Укрепление.

Радуйся, сердец смятенных тишайшая Усладо;  
Радуйся, странных и сирых Божественная Отрадо.

Радуйся, землю обетованную нам приуготовля-  
ющая; Радуйся, небесного Иерусалима врата нам  
отверзающая.

Радуйся, Владычице, знамения милости Твоя  
миру присно являющая.

### **Кондак 1 (поётся)**

Взбранной Воеводе и благой Одигитрии, путе-  
водящей нас к Небесному Граду, приидите при-  
падем вси, града зде пребывающего не имущи,  
Тоя всесильного заступления просяще, чудеса же  
от лет древних даже доныне от Иконы Ея бывае-  
мые поминающе, велегласно возопиим:

Радуйся, Владычице, знамения милости Твоя  
миру присно являющая.

## **Молитва первая ко Пресвятой Богородице**

О Царице Небесная! Кто изочтет великое множество чудес Твоих, кто исчислит вопли молитвенных прошений, токи умиленных слез, благодарных воздыханий, пролитых пред Иконою Твоею. Овеяна убо вся она скорбию народною, плачем угнетенных и радостною хвалою утешенных. Припадаху к ней людие, понесшие агарянское иго, плакаху Москва в смутное время, взываше Курск в нашествие вражеское. Вопияше вся область во дни смертоносных болезней и бед, и вся скорби на радость прелагала еси. Темже и ныне благослови землю Русскую. Спаси от греха, гибели и соблазнов страну нашу. Излей благодать на труд земледельческий и на всякое благое начинание общественное. Помяни, Пресвятая Дево, по имени всех предстоящих и молящихся и вся люди, требующия Твоего утешения, Помощи и милосердия. Ты убо веши тайная сердец наших. Темже всем по потребе их прошения исполни. Изряднее же заблудших обрати к покаянию, нас же всех умудри светом Евангельския любви и добрых дел. Архипастыри и пастыри и вся верныя в Православии до смерти тверды покажи, в Царство Небесное управи и со Христом жити сотвори во веки веков. Аминь.

## **Молитва вторая ко Пресвятой Богородице**

Царица наша преблагая, Надеждо наша Богородице, Приятелище сирых и странных Предстательнице, скорбящих Радосте, обидимых Покровительнице! Зриши нашу беду, зриши нашу скорбь; помози нам яко немощным, окорми нас яко странных. Обиду нашу веси, разреши ту, яко волиши, избави отечество наше, страждущую землю Российскую от лютаго безбожников обсто-  
яния, спаси и сохрани рабы Твоя (имя рек) и всех нас, зде предстоящих и молящихся, и покрый нас от всякаго зла честным Твоим Омофором, яко не имамы иныя Помощи разве Тебе, ни иныя Предстательницы, ни благия Утешительницы, токмо Тебе, о Богомати, яко да сохраниши ны и покрыеши во веки веков. Аминь.

### Тропарь, глас 4

**Я**ко необоримую стену и источник чудес, стяжавше Тя раби Твои, Богородице Пречистая, сопротивных ополчения низлагаем. Темже молим Тя, мир граду Твоему даруй и душам нашим велию милость.

### Кондак, глас 4

**Ч**естного образа Твоего знамение празднующе людие Твои, Богородительнице, имже дивную победу на сопротивных граду Твоему даровала еси, темже Тебе верою взываем: Радуйся, Дево, христиан Похвало.

### Ин кондак, глас 4


**П**риидите вернии, светло да празднуем всечестного образа Богоматери чудное явление, и от того благодать почерпающе, Первозданной умильно возопиим: Радуйся, Марие, Мати Божия Благословенная.

### Величание

**В**еличаем Тя, Пресвятая Дево, и чтим образ Твой честный, имже показала еси преславное знамение.







*Титульный лист  
издания Новой Коренной Пустыни  
в магопаке (штат Нью-Йорк)  
с благословением епископа Серафима  
1954 г.*